
PROPOSICIÓN DO GRUPO MUNICIPAL DE COMPOSTELA ABERTA PARA QUE O CONCELLO DE SANTIAGO CONTINÚE A IMPULSAR NOVOS ITINERARIOS ESCOLARES SEGUROS E A RECUPERACIÓN DO PROGRAMA 'COLECAMIÑOS'

O Grupo Municipal de Compostela Aberta, ao abeiro do regulamento orgánico municipal do Concello de Santiago, presenta a seguinte proposición para o seu debate no Pleno. O obxectivo do acordo consiste na ampliación do programa de camiños escolares seguros 'Colecamiños' impulsado no anterior mandato municipal e actualmente paralizado e sen novas incorporacións.

EXPOSICIÓN DE MOTIVOS:

O proxecto de camiños escolares seguros Colecamiños foi unha experiencia pioneira en Santiago que se desenvolveu no anterior mandato municipal 2015-2019 coa intención de promover un cambio nas pautas de mobilidade das crianzas da nosa cidade. Os "camiños escolares" non foron proxectos de carácter exclusivamente educativo, senón que tamén procuran que o alumnado poida moverse con seguridade e autonomía polas rúas e recupere o uso e aproveitamento do espazo público.

Trátase, pois, de proxectos que inciden de forma directa e global na trama urbana da cidade e que afectan a todas as áreas da xestión local ou municipal que teñen competencias no deseño, na habitabilidade e na seguridade do espazo público. Neste sentido o departamento impulsor e sobre o que recae o peso do proxecto é a Policía Local, que como policía de proximidade xoga un papel importante para favorecer a seguridade e a autonomía dos nenos e nenas nos seus desprazamentos ao colexio.

Entre os obxectivos do Colecamiños destacan: incrementar o número de menores que acoden a diario camiñando ao colexio desde as súas casas, fomentar modos de desprazamento máis sostibles, favorecer que as nenas e nenos acudan en compañía de amigos e compañeiros, minimizar os riscos nos accesos escolares, diminuír a inseguridade viaria existente, implicar aos familiares no proxecto para garantir maiores cotas de autonomía infantil, impulsar que o alumnado recupere o uso e aproveitamento do espazo público, integrar no contexto diario as normas e os valores inculcados na aula sobre a educación viaria para axudar a mudar as actitudes nesta materia e os hábitos de comportamento e fomentar a conciencia ecolóxica.

Ademais, os Colecamiños inclúen diversas actividades e fases de planificación que permiten sensibilizar á comunidade educativa, con especial fincapé no caso das crianzas, da importancia de organizar, crear e facer uso das rutas para desprazarse a pé ao colexio. Entre outras actividades realízanse obradoiros de sensibilización, análises da visión infantil a través de enquisas e charlas, encontros coa comunidade educativa, deseño das rutas máis seguras e puntos de encontro, modificacións urbanísticas para adaptar os espazos seguros aos máis pequenos, sinalización horizontal e vertical dos percorridos e das zonas disuasorias para os vehículos onde deixar e recoller os escolares, charlas educativas sobre seguridade viaria, charlas informativas coas persoas voluntarias que ofrecen aos escolares a posibilidade de cruzar con maior seguridade viaria, concurso de debuxos infantís, establecemento das “tendas amigas” cuxo persoal tamén axudará aos nenos e nenas cando poida ocorrer calquera contratempo, comunicación ás comunidades veciñais que contan con saídas de vehículos nos percorridos, campaña da “multa cívica” ou a campaña e concurso de cartas “Agora aconséllvos eu!”

Un proxecto de Camiños Escolares, que conta cunha mascota moi especial ‘Moito Olliño’ e que, no anterior mandato, estaba aberto a calquera colexio cuxos responsables mostren implicación e sensibilidade nos valores que transmite, como é o caso dos Colexios Apóstolo Santiago, do López Ferreiro ou o de Vite onde mostraron interese en desenvolver o programa. As boas cifras de acollida poden resumirse que en febreiro de 2019 eran máis de 150 as crianzas inscritas a través das súas familias na *app* do *Colecamiños*. Sendo o centro con máis participantes o CEIP Pío XII, cun total de 58; seguido polo CEIP Raíña Fabiola, con 50, e finalmente o Ramón Cabanillas onde xa había 44 inscritas e coas súas pulseiras.

Tendo en conta todo o anterior, e que son moitas as comunidades educativas interesadas e que pola contra nos últimos catro anos o goberno municipal non implemetou ningún colecamiño novo, o Grupo Municipal de Compostela Aberta presenta para debate plenario, o seguinte **ACORDO**:

- **Instar ao correspondente órgano de goberno a recuperar e volver impulsar o programa ‘Colecamiños’ coa dotación de recursos e incorporación no mesmo, das comunidades educativas interesadas.**

Santiago de Compostela, 12 de decembro de 2022

Xan Duro Fernández
Concelleiro do grupo municipal de Compostela Aberta

Á ATENCIÓN DO ALCALDE DE SANTIAGO